



Broj: 01-50-1-15-46/09

Sarajevo, 18. februara 2009. godine

ZAPISNIK

46. sjednice Predstavničkog doma Parlamentarne skupštine Bosne i Hercegovine, održane 18. februara 2009. godine

Sjednica je počela u 10,05 sati. Prisustvovalo je 36 poslanika. Opravdano su odsustvovali: Šemsudin Mehmedović, Zlatko Lagumdžija, Niko Lozančić, Vinko Zorić, Jovan Todorović i Sadik Ahmetović.

Iz Vijeća ministara BiH sjednici su prisustvovali ministri: Tarik Sadović, Sredoje Nović i Safet Halilović, te zamjenik ministra Vilim Primorac. Prisustvovao je i Milenko Šego, generalni revizor, zbog razmatranja izvještaja o reviziji.

Iz međunarodnih organizacija sjednicu su pratili predstavnici: OHR-a, OSCE-a, EUPM-a, Ambasade Velike Britanije, kao i nevladine organizacije Centri civilnih inicijativa.

U okviru prethodnih pitanja, predsjedavajući Doma Beriz Belkić upoznao je poslanike da je, u ime Kolegija, od Vijeća ministara BiH zatražio dostavljanje potrebnih materijala povodom inicijative Slavka Jovičića i Sadika Bahtića (usvojena na 45. sjednici), kao i za pitanja koja su na prošloj sjednici pokrenuli poslanici Denis Bećirović i Zlatko Lagumdžija, te Zajednička komisija za evropske integracije. Dodao je da će ova pitanja biti uvrštena u dnevni red kada za njih budu dostavljeni traženi materijali.

Predsjedavajući je također upoznao poslanike o tome da je Vijeće ministara BiH dostavilo Izvještaj o radu u 2008. godini koji je upućen komisijama radi razmatranja i dostavljanja mišljenja, te da će se, u skladu s Poslovnikom, Izvještaj razmatrati Domu u roku od 30 dana.

Također, predsjedavajući je upoznao poslanike da je Kolegij preduzeo potrebne aktivnosti u vezi s razmatranjem Amandmana I. na Ustav BiH, koji je u parlamentarnu proceduru dostavljen 16. februara i utvrdio hodogram razmatranja i usvajanja Amandmana.

Poslije iznošenja prethodnih pitanja, predsjedavajući je obrazložio izmjene i dopune u pozivu predloženog dnevnog reda. Reкао je da je skinut Izvještaj Radio-televizije Bosne i Hercegovine: o radu i poslovanju Radio-televizije Bosne i Hercegovine za 2007. godinu i o finansijskom poslovanju RTV Bosne i Hercegovine u 2007. godinu, jer nadležne komisije nisu dostavile mišljenja, kako je predviđeno Poslovnikom, te da su nadležne komisije pozvane da izvještaje ponovo razmotre i dostave mišljenja, nakon čega će ovi izvještaji biti uvršteni u dnevni red sjednice Doma.

U dnevni red uvršteni se materijali za koje su ispunjeni poslovnički uslovi, a to su:

- Prijedlog zakona o zaštiti domaće proizvodnje u okviru Sporazuma CEFTA (Zakon broj: 01-02-7-25-1/08., od 24.4.2008., predlagač: poslanik Jerko Ivanković Lijanović) – radi izjašnjavanja u drugom čitanju;

- Izvještaj o realizaciji Akcionog plana za provođenje programa mjera u okviru CEFTA sporazuma, s Analizom vanjskotrgovinske razmjene BiH za 2008. godinu;
- Imenovanje predsjednika, zamjenika i članova Nezavisnog odbora i Odbora za žalbe građana, kao nezavisnih tijela policijske strukture Bosne i Hercegovine (prijedlog Ad hoc zajedničke komisije za provođenje procedure imenovanja Nezasnog odbora i Odbora za žalbe građana).

U raspravi o prijedlogu dnevnog reda Denis Bećirović predložio je da se u dnevni red uvrsti tačka: Razmatranje kontinuiranih napada na novinare i novinarsku profesiju, s posebnim osvrtom na ugrožavanje nezavisnog medijskog izvještavanja u BiH.

Martin Raguž predložio je da se u dnevni red sjednice uvrsti: Informacija o poplavama u Popovom polju, rijeci Krupi i na području Hutovog blata, odnosno na prostoru općina Ravno, Trebinje i Čapljina. Za sjednicu je pripremio odgovarajući materijal, koji je dostavljen poslanicima.

U vezi s prijedlogom Martina Raguža, Milorad Živković je, uz ostalo, rekao da je nova tačka dnevnog reda predložena u skladu s Poslovníkom, da je dostavljen i materijal, ali da se vidi iz materijala da su prikupljene informacije samo od institucija Federacije BiH, a da nedostaju informacije od Vlade RS-a i relevantnih institucija RS-a. Zbog toga je predložio da se ovaj materijal uputi na razmatranje Zajedničkoj komisiji za ekonomske reforme i razvoj da prikupi i ostale informacije i Domu dostavi mišljenje, nakon čega bi se ovo stavilo na dnevni red.

Slavko Jovičić diskutirao je u vezi s prijedlogom Denisa Bećirovića. Rekao je da on nije protiv da se raspravlja o napadima na medije, ali da je potrebno imati cjelovitu informaciju. Ne smijemo se miješati u uređivačku politiku, ali zaista mediji su nevjerovatni. Ne postoji način, ne postoji zloupotreba koju ne koriste kako bi ovako kompliciranu situaciju još više usložili, rekao je Slavko Jovičić, iznoseći određene primjere o kojima su netačno i tendenciozno izvještavali mediji.

U raspravi o prijedlogu dnevnog reda još su učestvovali: Husein Nanić, Azra Hadžiahmetović i Jozo Križanović.

Husein Nanić rekao je da je na klupu dobio materijal pod nazivom „Operativni program BiH za poljoprivredu, ishranu i ruralni razvoj 2008. – 2011.“, ali da iz priloženog ne može saznati čiji je ovo dokument i šta s njim da se radi. Apelirao je da se vodi računa kad se dostavljaju materijali da se naznači od koga su i čemu treba da posluže, da bi poslanici znali kako da se odnose prema njima.

Azra Hadžiahmetović podržala je prijedlog Bećirovića, imajući u vidu i predložene zaključke koje je iznio Bećirović prilikom predlaganja tačke.

Jozo Križanović podržao je prijedlog Martina Raguža, rekavši da nije toliko bitno što sada nemamo informacije relevantnih organa RS-a, već je mnogo bitnije da su učinjene velike štete i da postoji problem koji treba rješavati.

Poslije rasprave povodom prijedloga dnevnog reda, Klub SNSD-a zatražio je pauzu.

Nakon pauze, Drago Kalabić obavijestio je da su tokom pauze izvršene konsultacije i da je postignut odgovarajući dogovor u vezi s tačkom dnevnog reda koju je predložio Martin Raguž.

Denis Bećirović rekao je da mu je prihvatljiv prijedlog Azre Hadžiahmetović, pa je istakao da pristaje da se prijedlog njegove tačke preformulira tako da glasi: Razmatranje zaključaka u vezi s kontinuiranim napadima na novinare, novinarsku profesiju s posebnim osvrtom na ugrožavanje nezavisnog medijskog izvještavanja u BiH.

Predsjedavajući je zatim dao na glasanje prijedloge za nove tačke dnevnog reda.

"Za" prijedlog Denisa Bećirovića glasala su 24 poslanika (iz Federacije BiH 20, iz RS-a četiri), "suzdržalo" se šest poslanika.

Predsjedavajući je konstatirao da prijedlog nije dobio entitetsku većinu i da će naknadno uslijediti usaglašavanje.

Prijedlog Martina Raguža usvojen je sa 28 glasova "za" (Federacija BiH 18, RS 10), "suzdržao" se jedan poslanik.

Predsjedavajući Belkić konstatirao je da je usvojen prijedlog Martina Raguža te da će biti uvršten u dnevni red kao 19.tačka.

Zatim je predsjedavajući Belkić konstatirao da je za 46. sjednicu Doma usvojen sljedeći

DNEVNI RED

1. Usvajanje Zapisnika 45. sjednice Predstavničkog doma;
2. Poslanička pitanja i odgovori;
3. Prijedlog zakona o dopuni Zakona o carinskoj tarifi BiH (drugo čitanje);
4. Izjašnjavanje u drugom čitanju o Prijedlogu zakona o zaštiti domaće proizvodnje u okviru Sporazuma CEFTA (Zakon broj: 01-02-7-25-1/08., od 24.4.2008., predlagač: poslanik Jerko Ivanković Lijanović);
5. Prijedlog zakona o dopuni Zakona o službenom glasilu BiH, predlagač: poslanik Adem Huskić (drugo čitanje);
6. Prijedlog zakona o javnim nabavkama BiH (prvo čitanje);
7. Prijedlog zakona o prijevozu opasnih materija (prvo čitanje);
8. Prijedlog zakona o poštama BiH (prvo čitanje);
9. Prijedlog zakona o oružju, s Mišljenjem Zajedničke komisije za odbranu i sigurnost BiH;
10. Prijedlog zakona o graničnoj kontroli, s Mišljenjem Zajedničke komisije za odbranu i sigurnost BiH;
11. Izvještaj komisije Kolegija o nastojanju za postizanje saglasnosti o Prijedlogu zakona o unutrašnjoj i pomorskoj plovidbi (zakon u prvom čitanju);
12. Izvještaj komisije Kolegija o nastojanju za postizanje saglasnosti o Prijedlogu zakona o sprečavanju nereda na sportskim takmičenjima (zakon u prvom čitanju);
13. Izvještaj komisije Kolegija o nastojanju za postizanje saglasnosti o Prijedlogu zakona o Garancijskom fondu (zakon u prvom čitanju);
14. Izvještaj komisije Kolegija o nastojanju za postizanje saglasnosti o Prijedlogu zaključka Zajedničke komisije za evropske integracije povodom rasprave o Informaciji predsjedavajućeg Vijeća ministara BiH o imenovanju direktora Direkcije za evropske integracije BiH;
15. Finansijski izvještaj Ureda za reviziju institucija BiH na dan 31.12.2006. i 31.12.2007. godine s Mišljenjem ovlaštenog revizora;
16. Izvještaj Ureda za reviziju institucija BiH o izvršenoj reviziji Izvještaja o izvršenju Budžeta institucija Bosne i Hercegovine za 2007. godinu;
17. Izvještaj o realizaciji Akcionog plana za provođenje programa mjera u okviru CEFTA sporazuma, s Analizom vanjskotrgovinske razmjene BiH za 2008. godinu;
18. Imenovanje predsjednika, zamjenika i članova Nezavisnog odbora i Odbora za žalbe građana kao nezavisnih tijela policijske strukture BiH (prijedlog Ad hoc Zajedničke komisije za provođenje procedure imenovanja Nezavisnog odbora i Odbora za žalbe građana);
19. Informacija o poplavama u Popovom polju, rijeci Krupi i na području Hutovog blata s prijedlogom zaključaka i
20. Davanje saglasnosti za ratifikaciju:
 - a) Sporazuma između Bosne i Hercegovine i Švicarske o readmisiji lica koja borave bez dozvole;
 - b) Sporazuma između Bosne i Hercegovine i Švicarske o olakšicama kod izdavanja viza;
 - c) Sporazuma o zajmu između Bosne i Hercegovine i Evropske banke za obnovu i razvoj „Projekat Koridor V c“;
 - d) Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji;
 - e) Sporazuma o zaštiti tajnih podataka između Vijeća ministara BiH i Vlade Republike Slovačke;
 - f) Sporazuma između Vijeća ministara BiH i Vlade Crne Gore o saradnji u oblasti kulture;
 - g) Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit;
 - h) Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti;
 - i) Okvirne konvencije Svjetske zdravstvene organizacije o kontroli duhana.

Ad. 1. Usvajanje Zapisnika 45. sjednice Predstavničkog doma

Predsjedavajući Doma Beriz Belkić iznio je primjedbu na Zapisnik da je u okviru 9. tačke pogrešno navedeno da je usvojen Prijedlog zakona o Garancijskom fondu u prvom čitanju, što je netačno, jer Prijedlog zakona nije dobio entitetsku većinu pa ide na usaglašavanje.

Uz ovu primjedbu, prilikom glasanja Zapisnik 45. sjednice usvojen je jednoglasno – sa 34 glasa (Federacija BiH 22, RS 12).

Ad. 2. Poslanička pitanja i odgovori

Predsjedavajući Belkić konstatirao je da su odgovore na pitanja do ove sjednice dobili poslanici:

- Denis Bećirović – na pitanje postavljeno na 34. sjednici;
- Mirko Okoklić – na pitanje postavljeno na 39. sjednici;
- Rifat Dolić – na pitanja postavljena na 40. i 41. sjednici;
- Mehmed Suljkanović – na pitanje postavljeno na 42. sjednici;
- Šemsudin Mehmedović – na dva pitanja postavljena na 42. sjednici.
- Jozo Križanović dobio je informaciju o osiguranju boljih tehničkih uslova rada na sjednicama Doma – povodom pitanja postavljenog na 39. sjednici;
- Denis Bećirović je od Kolegija Doma dobio odgovor na pitanje postavljeno na 44. sjednici – vezano za realizaciju zaključaka Doma;
- Azra Alajbegović je od Kolegija Doma dobila odgovor na pitanje postavljeno na 45. sjednici.

Odgovore na pitanja komentirali su Rifat Dolić i Velimir Jukić. Mehmed Suljkanović rekao je da je od predsjedavajućeg saznao da je dobio odgovor koji je tek sad pogledao, pa da stoga zadržava pravo da ovaj odgovor komentira na narednoj sjednici.

Branko Dokić je, u okviru komentara na odgovore, iznio svoj protest što ne dobiva odgovore na pitanja koja je postavljao, a ima ih više, te ukazao na neodgovornost ministra Alkalaja i Vijeća ministara BiH što nisu odgovorili na pitanje u vezi s problemom koji je stvoren zbog viza za građane Ruske Federacije. Dodao je da je prošlo više od mjesec dana, a pitanje je bilo veoma aktuelno te da je napravljena jedna vrsta diplomatskog skandala.

Predsjedavajući Belkić izrazio je žaljenje što sjednici ne prisustvuje niko iz Ministarstva vanjskih poslova BiH, te rekao da će on uputiti urgenciju za dostavljanje odgovora.

Postavljena su nova poslanička pitanja kako slijedi:

Sadik Bahtić:

„Imam jedno poslaničko pitanje za Vijeće ministara BiH i Generalni sekretarijat Vijeća ministara BiH.

Ko je i kada je osnovao Komisiju za državnu imovinu:

- a) Kome Komisija za državnu imovinu odgovara za svoj rad? Koji su zadaci Komisije za državnu imovinu i na koji način Komisija podnosi svoj izvještaj o radu?
- b) Zašto je Vijeće ministara BiH prekršilo Odluku o imenovanju članova Komisije donoseći zaključak na 6. tematskoj sjednici održanoj 13.11.2008. kojom Vijeće ministara BiH zadužuje Komisiju da pripremi i dostavi nacrt zakona o sljedećim principima:
 - da u vlasništvu države bude nepokretna imovina potrebna za rad državnih institucija uključujući perspektivnu nepokretnu i pokretnu vojnu imovinu,
 - da ostala imovina kao i neperspektivna vojna imovina budu u vlasništvu entiteta, odnosno kantona i općina u skladu s potrebama entiteta, kantona i općinskih institucija.
- c) Zašto Komisija nije krenula s popisom cjelokupne državne imovine jer im je to osnovni zadatak po Odluci o osnivanju Komisije, „Službeni glasnik BiH“ br. 10/05, propisan u članu 1., članu 2. pod c) te odluke? I

- d) Zašto predsjedavajući Komisije, gospodin Kutleša, zloupotrebljava svoj položaj i donosi odluke bez kvoruma Komisije, vrlo bitno, bez kvoruma Komisije po kojoj zadužuje Dževada Delića da pripremi obrazac i kriterije za popis državne imovine, kada gospodin Delić nije ni legitimni član te komisije, jer je u međuvremenu iz Federalne uprave za geodetske i imovinsko-pravne poslove, odakle je imenovan u Komisiji prešao i zaposlen je u Generalnom sekretarijatu kao podređeni gospodinu Kutleši?“

Halid Genjac:

„Ja imam jedno pitanje predsjedniku Ustavnog suda RS-a. Zašto Ustavni sud RS-a koji bi trebalo da štiti Ustav RS-a provodi antiustavnu praksu, odnosno zašto Ustavni sud radi po Poslovniku koji ima antiustavne odredbe? Kad će Ustavni sud svoj poslovnik uskladiti sa Ustavom RS-a i šta će biti s odlukama koje su na ovom sudu donesene po antiustavnoj proceduri?“

Savo Erić:

„Da li i u kojoj mjeri pomoć privredi BiH namjerava preduzeti Vijeće ministara BiH s ciljem ublažavanja recesije i krize koja zahvata cijeli svijet?

- a) Da li se razmišlja o smanjenju poreskih stopa?
- b) Kakav je priliv PDV-a u januaru i februaru ove godine u poređenju s januarom i februarom 2008. godine?“

Husein Nanić:

Vlada Unsko-sanskog kantona je uz iskazanu zainteresiranost općina iz Unsko-sanskog kantona prije nekoliko godina pokrenula inicijativu za plinifikaciju tog kantona. S obzirom na aktuelnu energetska situaciju sa snabdijevanjem plinom naše zemlje i iskazanu spremnost vlade i općina, postavljam pitanje ministru i menadžmentu BH gasa d.o.o. Sarajevo – Da li ste dobili zvaničan zahtjev, inicijativu za pokretanje projekta plinifikacije, šta ste do sada preduzeli i šta ćete preduzeti da se navedena inicijativa aktuelizira i pokrene procedura i njena realizacija?

Drugo pitanje također ministarstvu, Federalnom ministarstvu energije, rudarstva i industrije i direktoru Federalne agencije za privatizaciju.

Postavljam pitanje, dakle ministru i direktoru Federalne agencije za privatizaciju – Da li se prati realizacija preuzetih obaveza po Ugovoru o dokapitalizaciji „Energopetrola“ i šta je vlada i agencija preduzela i šta će preduzeti da se ugovor u potpunosti ispoštuje?

Rifat Dolić:

„Koji su razlozi da Vijeće ministara BiH do danas nije izvršilo Zaključak ovog doma, od 14.7.2008., koji je glasio: Zadužuje se Vijeće ministara BiH da u roku od 30 dana pripremi i Predstavničkom domu dostavi informaciju o stanju i statusu imovine države, firmi i građana BiH u zemljama nastalim raspadom bivše SFRJ s planom aktivnosti na njoj zaštiti i preuzimanju od strane legalnih vlasnika? I osjećate li se kao čelni čovjek Vijeća ministara BiH direktno odgovornim za štete koje su u međuvremenu nastale nezakonitim uzimanjem imovine „Agrokomerca“ u Republici Hrvatskoj vrijedne 5 miliona maraka zbog nepreduzimanja potrebnih radnji Vijeća ministara BiH i institucija BiH na njoj zaštiti?“

Tražim od rukovodstva i Sekretarijata Doma da sva moja poslanička pitanja i inicijative koje se odnose na zahtjeve o zaštiti imovine „Agrokomerca“ u Republici Hrvatskoj prosljedi državnom pravobranioocu na ocjenu. A ja mu stojim na raspolaganju za sve dodatne informacije i eventualno potrebnu dokumentaciju.“

Denis Bećirović:

„Ja imama dva poslanička pitanja, bit ću veoma kratak. Na 24. sjednici Predstavničkog doma predložio sam inicijativu koja je usvojena i koja je obavezala Vijeće ministara BiH da dostavi tekst Strategije za borbu protiv korupcije i kriminala u BiH. Podsjećam, Parlament je tu inicijativu usvojio 13. februara 2008. Evo, dakle, prošlo je više od godinu dana, obavezali smo, kao parlament, Vijeće ministara BiH da nam dostavi u roku od tri mjeseca tu inicijativu, ali do ovog trenutka nije ništa

urađeno, odnosno nije dostavljeno ništa Predstavničkom domu Parlamentarne skupštine BiH. A Strategija za borbu protiv kriminala i korupcije koja je važila za period 2006. - 2009. godina je istekla.

Moje pitanje Vijeću ministara BiH: Zašto ne poštujete odluku Parlamentarne skupštine BiH, odnosno Predstavničkog doma?

Drugo pitanje, na 41. sjednici, održanoj 3. decembra 2008., predložio sam zaključak koji je također Predstavnički dom usvojio, a odnosi se na obavezu dostavljanja Akcionog plana o provođenju Sporazuma o stabilizaciji i pridruživanju, kako smo zaključili, najkasnije u roku od sedam dana, nakon čega će Predstavnički dom poslije obavljene rasprave donijeti svoj program rada u vezi s ovim pitanjem.

Ponovo pitanje za Vijeće ministara BiH: Zašto niste ispoštovali ovaj zaključak Predstavničkog doma?“

Velimir Jukić:

„Šta preduzima ministar vanjskih poslova BiH gospodin Sven Alkalaj da se u skladu sa Ustavom BiH izvrši balansiranje nacionalne strukture zaposlenih i rukovodilaca u Ministarstvu vanjskih poslova BiH uključujući i zaposlene u DKP mreži?“

Azra Alajbegović:

„Da li će i kako koristiti saznanja koja smo čuli na dvodnevnom seminaru koji je organizirao OSCE-a o sigurnosnoj politici u BiH, a vezano je za zaključke ovog dvodnevnog seminara. Znači da li će koristiti i kako će koristiti s obzirom na moj subjektivni dojam da je na tom seminaru bilo neoprostivo malo službenika Ministarstva sigurnosti BiH?“

Ad 3. Prijedlog zakona o dopuni Zakona o carinskoj tarifi BiH (drugo čitanje)

U uvodnim napomenama predsjedavajući Belkić podsjetio je na Izvještaj nadležne komisije, koja je usvojila Prijedlog zakona u drugoj komisijskoj fazi s jednim amandmanom i odgovarajućim zaključkom.

Momčilo Novaković je u raspravi, uz ostalo, rekao da je iznenađen kako je ovaj zakon došao sada na dnevni red kada je Dom na 45. sjednici, prilikom usvajanja Prijedloga zakona u drugom čitanju, usvojio zaključak kojim je Ministarstvo vanjske trgovine i ekonomskih odnosa BiH zaduženo da sačini i do razmatranja Prijedloga zakona u drugom čitanju dostavi listu proizvoda prema potrebama i drugih proizvođača i prerađivača iz oblasti poljoprivredne proizvodnje, metalne i tekstilne industrije, koji imaju potrebu za dobivanje olakšica.

Slavko Jovičić, vršilac dužnosti predsjedavajućeg Komisije za vanjsku trgovinu i carine, obrazložio je Izvještaj ove komisije. Nakon toga je rekao da je Ministarstvo vanjske trgovine i ekonomskih odnosa BiH dostavilo traženu listu, ali da je Komisija nije mogla pripremiti za ovu sjednicu jer samo za šećer postoji saglasnost Uprave za indirektno oporezivanje BiH, ali je u Izvještaju predložen zaključak da se to uradi što prije.

U raspravi su dalje učestvovali: Momčilo Novaković, Slavko Jovičić, Velimir Jukić, Salko Sokolović, Mirko Okolić, Mehmed Suljkanović, Jerko Ivanković Lijanović, Jozo Križanović, Selim Bešliagić i Hadži Jovan Mitrović. U raspravi je bilo prijedloga i za odgađanje izjašnjavanja i za usvajanje predloženog zakona.

Mirko Okolić predao je prijedlog zaključka u pisanoj formi, koji je prilikom glasanja modificiran radi usklađivanja s Poslovníkom, pa je usvojen sljedeći zaključak:

Odgada se izjašnjavanje u drugom čitanju o Prijedlogu zakona o dopuni Zakona o carinskoj tarifi, uz ovlaštenje Kolegiju Doma da odredi vrijeme kada će se dati Domu na izjašnjavanje.

Ovaj zaključak usvojen je sa 18 glasova "za" (Federacija BiH 13, RS pet), devet "protiv" i sedam "suzdržanih".

Ad 4. Izjašnjavanje u drugom čitanju o Prijedlogu zakona o zaštiti domaće proizvodnje u okviru Sporazuma CEFTA (Zakon broj: 01-02-7-25-1/08., od 24.4.2008., predlaže: poslanik Jerko Ivanković Lijanović)

U uvodnim napomenama predsjedavajući Belkić podsjetio je da je na 32. sjednici Doma, 14. jula 2008., odgođeno izjašnjavanje o Prijedlogu zakona iz ove tačke u drugom čitanju, uz usvajanje Zaključka, kojim je, uz ostalo, zaduženo Vijeće ministara BiH da do kraja 2008. godine pripremi sveobuhvatnu analizu efekata primjene CEFTA sporazuma i Sporazuma o stabilizaciji i pridruživanju na vanjskotrgovinski bilans BiH. Napomenuo je da je J. I. Lijanović, 17. februara 2009., u proceduru dostavio još jedan prijedlog zakona o zaštiti domaće

proizvodnje sa zahtjevom da se razmatra po hitnom postupku, ali da to nije u skladu s Poslovnikom, jer se prvo mora okončati procedura po zakonu koji je prvi podnesen.

Također je predsjedavajući napomenuo da je o Prijedlogu zakona na 32. sjednici završena rasprava.

Prilikom glasanja, Prijedlog zakona o zaštiti domaće proizvodnje u okviru Sporazuma CEFTA usvojen je sa 22 glasa "za" (Federacija BiH 17, RS pet), četiri "protiv" i sedam "suzdržanih".

Ad. 5. Prijedlog zakona o dopuni Zakona o službenom glasilu BiH, predlagač: poslanik Adem Huskić (drugo čitanje)

Predsjedavajući Belkić podnio je kratke uvodne napomene.

Adem Huskić kratko je govorio u svojstvu predlagača.

U raspravi su učestvovali Milorad Živković i Velimir Jukić.

Prilikom glasanja, sa 30 glasova "za" (Federacija BiH 18, RS 12) i jednim "suzdržanim", usvojen je Zakon o dopuni Zakona o službenom glasilu BiH u drugom čitanju.

Na prijedlog Milorada Živkovića, sa 31 glasom "za" (Federacija BiH 19, RS 12), dva "protiv" i jednim "suzdržanim", usvojen je sljedeći zaključak:

Predstavnički dom Parlamentarne skupštine BiH zadužuje Vijeće ministara BiH da, u roku od 15 dana, obavijesti Parlamentarnu skupštinu BiH o konkretnim preduzetim mjerama i aktivnostima vezanim za rješavanje pravnog statusa Službenog lista Bosne i Hercegovine.

Ad. 6. Prijedlog zakona o javnim nabavkama BiH (prvo čitanje)

U uvodnim napomenama predsjedavajući je podsjetio na Mišljenje nadležne Komisije za finansije i budžet i prijedlog zaključka, kojim je Komisija odredila da provede javnu raspravu.

Predsjedavajući Komisije Sadik Bahtić kratko je obrazložio Mišljenje Komisije.

U raspravi je učestvovao Milorad Živković.

Prilikom glasanja Dom je jednoglasno, sa 34 glasa "za" (Federacija BiH 22, RS 12), usvojio Prijedlog zakona o javnim nabavkama BiH u prvom čitanju, uz konstataciju da će Komisija za finansije i budžet provesti javnu raspravu.

Ad. 7. Prijedlog zakona o prijevozu opasnih materija (prvo čitanje)

Kratke uvodne napomene dao je predsjedavajući Belkić.

U raspravi su učestvovali: Momčilo Novaković, Milorad Živković, Beriz Belkić, Šefik Džaferović, Branko Dokić (u ime nadležne komisije), Adem Huskić, Sadik Bahtić i Remzija Kadrić.

Prilikom glasanja Prijedlog ovog zakona nije dobio entitetsku većinu pa slijedi usaglašavanje u Kolegiju kao komisiji. "Za" Prijedlog zakona glasala su 24 poslanika (Federacija BiH 22, RS dva), devet je glasalo "protiv", "suzdržao" se jedan poslanik.

Ad. 8. Prijedlog zakona o poštama BiH (prvo čitanje)

Poslije uvodnih napomena predsjedavajućeg, u ime nadležne komisije kratko je govorio Branko Dokić.

U raspravi su učestvovali: Sadik Bahtić, Remzija Kadrić i Milorad Živković.

Prijedlog zakona jednoglasno je usvojen u prvom čitanju - sa 34 glasa "za" (Federacija BiH 22, RS 12).

Ad. 9. Prijedlog zakona o oružju, s Mišljenjem Zajedničke komisije za odbranu i sigurnost BiH

U uvodnim napomenama predsjedavajući Belkić podsjetio je da je nadležna komisija po treći put dostavila negativno mišljenje o principima predloženog zakona.

Ministar sigurnosti BiH Tarik Sadović podnio je Domu obrazloženje Prijedloga zakona i predložio da se Prijedlog zakona usvoji u prvom čitanju, pa da se u amandmanskoj fazi eventualno vrše određene popravke.

U raspravi su učestvovali: Halid Genjac, Milorad Živković, Beriz Belkić, Drago Kalabić, Bakir Izetbegović i ministar Tarik Sadović.

Sa 23 glasa "za" (Federacija BiH 11, RS 12), deset "protiv" i jednim "suzdržanim", usvojeno je Mišljenje Zajedničke komisije za odbranu i sigurnost BiH.

Predsjedavajući je konstatirao da je, usvajanjem negativnog mišljenja, odbijen Prijedlog zakona o oružju.

Ad. 10. Prijedlog zakona o graničnoj kontroli, s Mišljenjem Zajedničke komisije za odbranu i sigurnost BiH

Predsjedavajući Belkić podsjetio je da je peti put negativno mišljenje Zajedničke komisije za odbranu i sigurnost BiH o Prijedlogu zakona o graničnoj kontroli.

U raspravi je Šefik Džaferović rekao da ima saznanja da postoji spremnost da se u amandmanskoj fazi prihvati ono što je usaglašeno u Vijeću ministara BiH, pa je apelirao da se Prijedlog zakona usvoji u prvom čitanju.

U daljnjoj raspravi učestvovali su: Drago Kalabić, Jozo Križanović, Selim Bešlić i Adem Huskić.

Prilikom glasanja Mišljenje Zajedničke komisije za odbranu i sigurnost BiH nije dobilo entitetsku većinu – "za" je glasalo 19 poslanika (Federacija BiH sedam, RS 12), "protiv" 12, "suzdržao" se jedan poslanik. Prema tome, o Mišljenju slijedi usaglašavanje u Kolegiju kao komisiji.

Ad. 11. Izvještaj komisije Kolegija o nastojanju za postizanje saglasnosti o Prijedlogu zakona o unutrašnjoj i pomorskoj plovidbi (zakon u prvom čitanju)

U uvodnim napomenama predsjedavajući je podsjetio da u Kolegiju kao komisiji nije postignuta saglasnost o Prijedlogu zakona.

U drugom krugu glasanja "za" Prijedlog zakona glasala su 22 poslanika, "protiv" je glasalo 11 – svi iz Republike Srpske, što je više od 2/3 iz entiteta.

Predsjedavajući je konstatirao da je Prijedlog zakona o unutrašnjoj i pomorskoj plovidbi odbijen u prvom čitanju.

Ad. 12. Izvještaj komisije Kolegija o nastojanju za postizanje saglasnosti o Prijedlogu zakona o sprečavanju nereda na sportskim takmičenjima (zakon u prvom čitanju)

Nije bilo saglasnosti u Kolegiju kao komisiji ni o Prijedlogu zakona iz ove tačke, rekao je u uvodnim napomenama predsjedavajući Belkić.

U drugom krugu glasanja "za" su glasala 23 poslanika, a "protiv" je glasalo 11 iz RS-a, što je više od 2/3 iz entiteta.

Predsjedavajući Belkić konstatirao je da je odbijen u prvom čitanju i Prijedlog zakona o sprečavanju nereda na sportskim takmičenjima.

Ad. 13. Izvještaj komisije Kolegija o nastojanju za postizanje saglasnosti o Prijedlogu zakona o Garancijskom fondu (zakon u prvom čitanju)

Također, u Kolegiju kao komisiji nije postignuta saglasnost o Prijedlogu zakona o Garancijskom fondu.

U drugom krugu glasanja "za" Prijedlog zakona glasala su 23 poslanika, a "protiv" je glasalo 11 iz RS-a, što je više od 2/3 iz entiteta.

Predsjedavajući je konstatirao da je odbijen Prijedlog zakona o Garancijskom fondu u prvom čitanju.

Ad. 14. Izvještaj komisije Kolegija o nastojanju za postizanje saglasnosti o Prijedlogu zaključka Zajedničke komisije za evropske integracije povodom rasprave o Informaciji predsjedavajućeg Vijeća ministara BiH o imenovanju direktora Direkcije za evropske integracije BiH

Nakon što u Kolegiju nije postignuta saglasnost, ni u drugom krugu glasanja nije usvojen predloženi zaključak. "Za" je glasao 21, "protiv" 13 poslanika, pri čemu je iz RS-a bilo 11 "protiv".

Ad. 15. Finansijski izvještaj Ureda za reviziju institucija BiH na dan 31.12.2006. i 31.12.2007. godine s Mišljenjem ovlaštenog revizora

U uvodnim napomenama predsjedavajući Belkić podsjetio je da je nadležna Komisija za finansije i budžet prihvatila Finansijski izvještaj iz ove tačke i isto predlaže i Domu.

U ime Komisije kratko je govorio Sadik Bahtić.

Nije bilo rasprave.

Prilikom glasanja, sa 29 glasova "za" (Federacija BiH 17, RS 12) i pet "suzdržanih", usvojen je Finansijski izvještaj Ureda za reviziju institucija BiH na dan 31.12.2006. i 31.12. 2007. godine, s Mišljenjem ovlaštenog revizora i Izvještajem nadležne Komisije za finansije i budžet.

Ad. 16. Izvještaj Ureda za reviziju institucija BiH o izvršenoj reviziji Izvještaja o izvršenju Budžeta institucija Bosne i Hercegovine za 2007. godinu

U uvodnim napomenama predsjedavajući Belkić podsjetio je na Zbirni izvještaj Komisije za finansije i budžet o izvještajima o reviziji svih institucija BiH za 2007. godinu, u kojem je navedeno da je i Izvještaj o reviziji Izvještaja o izvršenju Budžeta dobio „mišljenje s rezervom“. Također je podsjetio na Izvještaj nadležne Komisije za finansije i budžet i zaključke sadržane u Izvještaju.

Nije bilo rasprave.

Prilikom glasanja, sa 27 glasova "za" (Federacija BiH 18, RS devet) i sedam "suzdržanih", usvojen je Izvještaj Ureda za reviziju institucija BiH o izvršenoj reviziji Izvještaja o izvršenju Budžeta institucija BiH za 2007. godinu, sa Izvještajem Komisije i zaključcima i preporukama sadržanim u Izvještaju.

Ad. 17. Izvještaj o realizaciji Akcionog plana za provođenje programa mjera u okviru CEFTA sporazuma, s Analizom vanjskotrgovinske razmjene BiH za 2008. godinu

Predsjedavajući Belkić je iznio uvodne napomene.

U raspravi su učestvovali: Momčilo Novaković, Jerko Ivanković Lijanović, Mehmed Suljkanović, Slavko Jovičić, Mirko Okolić, Bakir Izetbegović, Selim Bešlić, Velimir Jukić i Adem Huskić.

Prilikom glasanja, Dom je, s 27 glasova "za" (Federacija BiH 19, RS osam) i sedam "suzdržanih", usvojio Izvještaj o realizaciji Akcionog plana za provođenje programa mjera u okviru CEFTA sporazuma, a Analizu vanjskotrgovinske razmjene BiH za 2008. godinu primio k znanju. Uz ove akte Dom je usvojio i Mišljenje nadležne Komisije za vanjsku trgovinu i carine, sa zaključkom sadržanim u Mišljenju, koji glasi:

Zadužuje se Vijeće ministara BiH da u okviru svojih nadležnosti, u saradnji s nadležnim institucijama BiH, pripremi dodatne mjere s ciljem poboljšanja konkurentnosti kompletne bh. privrede.

Ad. 18. Imenovanje predsjednika, zamjenika i članova Nezavisnog odbora i Odbora za žalbe građana kao nezavisnih tijela policijske strukture BiH (prijedlog Ad hoc Zajedničke komisije za provođenje procedure imenovanja Nezavisnog odbora i Odbora za žalbe građana)

U uvodnim napomenama predsjedavajući Belkić podsjetio je da je Ad hoc zajednička komisija, na zahtjev Kolegija, dostavila dopunu ranije dostavljenog izvještaja, i upotpunila liste kandidata.

Nije bilo rasprave.

Prilikom glasanja (glasalo se odvojeno o listama) Dom je, sa 21 glasom "za" (Federacija BiH 16, RS pet), četiri "protiv" i sedam "suzdržanih", usvojio liste kandidata kako je predložila Ad hoc zajednička komisija, i to:

I. Lista kandidata za članove Nezavisnog odbora:

1. Žiko Krunić – predsjednik
2. Bakir Dautbašić – zamjenik predsjednika
3. Mato Jozić - član
4. Viktor Dadić - član
5. Stanko Nuić - član
6. Zijad Kadić - član
7. Vojin Bera - član
8. Dragan Savić - član
9. Samir Rizvo - član

II. Lista kandidata za članove Odbora za žalbe građana:

1. Lidija Bagarić - predsjednik
2. Slavojka Gluhović - zamjenik predsjednika
3. Željko Travar - član
4. Danica Berić - član
5. Lejla Babović - član
6. Refik Džubur - član
7. Sead Hadžić - član

Ad. 19. Informacija o poplavama u Popovom polju, rijeci Krupi i na području Hutovog blata s prijedlogom zaključaka

Martin Raguž je, u svojstvu predlagачa, podnio obrazloženje ove informacije.

U raspravi su učestvovali: Momčilo Novaković, Drago Kalabić, Martin Raguž, Milorad Živković i Velimir Jukić.

Milorad Živković je, u ime Kluba SNSD-a, predložio zaključak koji glasi:

Zadužuje se Ministarstvo vanjske trgovine i ekonomskih odnosa BiH da, u saradnji s entitetskim resornim ministarstvima, do naredne sjednice Doma dostavi informaciju o nedavnim poplavama u Popovom polju, rijeci Krupi i na području Hutovog blata.

Ovaj zaključak usvojen je jednoglasno – sa 34 glasa "za" (Federacija BiH 22, RS 12).

Ad. 20. Davanje saglasnosti za ratifikaciju:

- a) Sporazuma između Bosne i Hercegovine i Švicarske o readmisiji lica koja borave bez dozvole;

- b) Sporazuma između Bosne i Hercegovine i Švicarske o olakšicama kod izdavanja viza;
- c) Sporazuma o zajmu između Bosne i Hercegovine i Evropske banke za obnovu i razvoj – „Projekat Koridor V c“;
- d) Sporazuma između Vijeća ministara BiH, koje predstavlja Ministarstvo finansija i trezora BiH, i Vlade Republike Austrije, koju predstavlja savezni ministar finansija, o finansijskoj saradnji;
- e) Sporazuma o zaštiti tajnih podataka između Vijeća ministara BiH i Vlade Republike Slovačke;
- f) Sporazuma između Vijeća ministara BiH i Vlade Crne Gore o saradnji u oblasti kulture;
- g) Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit i Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju Sporazuma između Vijeća ministara BiH i Vlade Crne Gore o vraćanju i prihvatanju lica čiji je ulazak ili boravak nezakonit;
- h) Memoranduma o razumijevanju između Bosne i Hercegovine i Evropske zajednice o pridruživanju Bosne i Hercegovine Sedmom okvirnom programu Evropske zajednice za istraživanje, tehnološki razvoj i ogledne aktivnosti;
- a) Okvirne konvencije Svjetske zdravstvene organizacije o kontroli duhana.

Predsjedavajući Belkić podsjetio je da je Komisija za vanjske poslove dala pozitivno mišljenje o materijalima iz ove tačke i predložila Domu davanje saglasnost za njihovu ratifikaciju.

Predsjedavajući Komisije Slavko Matić obrazložio je ukratko mišljenja Komisije.

U raspravi su učestvovali Lazar Prodanović i Azra Alajbegović.

Sa 33 glasa "za" (Federacija BiH 21, RS 12) i jednim "suzdržanim", Dom je dao saglasnost za ratifikaciju svih akata iz ove tačke.

Ovim je realiziran dnevni red 46. sjednice.

Sjednica je završena u 17,10 sati.

Sastavni dio Zapisnika je transkript 46. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVALJUĆI
PREDSTAVNIČKOG DOMA
Beriz Belkić